



池上詩人

郡人劉廷鑿編

同學吳應夢較

五言古詩

張祜

西江行

日下西塞山南來洞庭客晴空一鳥渡萬里秋江碧
惆悵異鄉人偶言空脉脉

晚途中作

落日驅車道秋郊思不勝水雲遙斷緒山日半銜稜



遠吠鄰村處計想羨他能

湏州寺路

日欲西澗陰遠驅愁突兀烟苔濕凝地露竹清滴月
時見一僧來柳邊雲勃勃

夜雨

靄靄雲四黑秋林響空堂始從寒瓦中

愁人腸

愁腸方九迴寂寂夜未央

遊天台

崔嵬海西鎮靈跡傳萬古羣峰日來朝累累孫侍祖

三茅卽拳石二室猶塊土旁洞窟神仙中巖宅龍虎

名從乾取象位與坤作輔鸞鶴自相羣前人空若瞽

巉巖到秋碧媧女徒巧補視聽出塵埃處高心漸苦

纔登招手石肘底笑天姥仰看華蓋尖赤日雲上午

奔雷撼深谷下見山脚雨回首望四明轟轟若城堵

昏晨邈千態恐動非自主控鵠大夢中坐覺身詡詡

東溟子時月却孕元化母彭蠡不盈盃浙江微辨縷

石梁屹橫架萬仞千壁豎却瞰赤城顛勢來如刀努

盤松國清道九里天莫覩窮崇上嶺三峽屹傍聳五

空厓絕凡路癡立麋與塵邈峻極天門觀海窮地戶
金庭路非遠徙步欲將舉身樂道家流敦儒者一矩
行尋白雲叟禮象登峻宇佛窟了杉枿仙檀半榛莽
縣厓與飛瀑險噴難足俯海眼三井通羽門雙闕柱
瓊臺下昏側手足前采乳但造不死鄉前勞何足數

費冠卿

感懷

笑獨不爲苦求名始辛酸上國無交親請謁多少難
九月風到面羞汗成冰片求名俟公道名與公道遠
力盡得一名他喜我且輕家書十年絕歸去知誰榮

馬嘶渭橋柳特地起愁聲

枕流石

不爲幽岸隱古色涵空出願以清泚流鑒此堅貞質
傍臨玉光潤時瀉苔花密徃徃驚游鱗尚疑垂釣日

掛樹藤

本爲獨立難寄彼高樹枝蔓衍數條遠溟濛千朶垂
向日助成陰當風藉持危誰言柔可屈坐見蟠蛟螭

七言歌行

王季文

九華山謠

九華崢嶸占南陸蓮花擢本山牛腹翠屏橫截萬里
天瀑水落深千丈玉雲梯石磴入杳冥俯看四極如
中庭丹崖壓下廬霍勢白日隱出斗牛星杉松一歲
抽數尺瓊草黃綠秀層壁南風拂曉烟霧開滿山葱
蒨鋪鮮碧雷霆往往從地發龍卧豹藏安可別峻極
遙看憂昊蒼挺生豈得無才傑神仙憚險莫敢登馭

風駕鶴循邱陵陽鳥不見峰頂樹大火尚結巖中冰
靈光爽氣曛復旭晴天倒影西墜淥具區彭蠡來兩
傍正可別作一嶽當少陽

孟暹

發蕙風館遇陰不見九華山有作

我來淮陰城千江萬山無不經山青水碧千萬丈奇
峯急派何縱橫又聞九華山山頂連青冥太白有逸
韻使我西南行一步一攀策前行正雞鳴陰雲冉冉
忽飛起千里萬里危崢嶸譬如天之有日蝕使我昏
沉猶不明人家敲鏡救不得光影却屬貪狼星恨亦
不能通言亦不能聽長鞭揮馬出門去是以九華爲
不平

費冠卿

以拾遺召不起賦詩

君親同是先王道何如骨肉一處老也知臣子合佐
時自古榮華誰可保

顧雲

天威逕行

蠻嶺高蠻海濶去舸迴艘投此歇一夜舟人得夢間
草草相呼一時發颶風怒起雲顛狂波濤擺掣魚龍
僵海神迫急上岸走山靈股栗入石藏金蛇飛伏霍
閃過白日倒掛銀繩長轟轟訶訶雷車轉霹靂一聲
天地戰風定雲開始望看萬里有天才四片車遙遙
馬闐闐雲南八國萬部落皆從此路來朝天耿恭拜
出井底水廣利刺開山上泉若論終在濟物意二將
之功皆小焉

華清詞

祥雲皓鶴盤碧空喬松梢梢韻微風絳節影來朱旂
響丁東相公清齋朝蓋宮太上符籙龍蛇散花天女
侍香童隔烟遙望見雲水瑛吹鳳清瓏瓏丹砂黃金
世可度願啓一言告仙翁道門弟子山中客長向山
中禮空碧九色真龍上漢時願把霓幢引仙客一作烟策
池陽醉歌贈匡廬處士姚巖傑
九華太守行春罷一作暇高絳紅筵壓花榭四面繁英
拂檻開帖雪團霞墜枝亞空中焰若燒藍天萬里滑
靜無纖烟絃索緊快管聲脆急曲碎拍聲相連主人

憐才多傾輿許客酣歌露真性春耐香濃枝盞粘一
醉有時三日病龜潭鱗粉解不去鴉嶺藍花澆不醒
肺枯似著爐鞴煽腦熱如遭鋌鑿釘蒙溪先生梁公
孫忽然示我十軸文展開一卷讀一首四顧特地無
涯垠又開一軸讀一帙酒病豁若風驅雲文鋒幹破
造化窟心刃掘出興亡根經疾史恙萬片恨墨炙筆
針如有神呵叱潘陸鄙瑣屑提挈楊孟歸孔門時時
說及開元理家風颯颯吹人耳吳兢纂出昇平源十
事分明鋪在紙裔孫才業今如此誰人爲奏明天子

鸞駕何當獵 馮神鷹一擲望千里戲操狂翰浣蠻

牋傍人莫笑我率然

苔歌

檻前溪奪秋空色百丈潭心數砂礫松筠一作條條

長碧苔苔色碧於溪水碧波迴梳開孔雀尾根細貼

着盤陀石撥浪輕拈出少時一髻濃烟三四尺山光

日華亂相射靜縷藍鬢勻鬟積試把臨流一作抖擻

看琉璃珠子淚雙滴如看玉女洗頭處解破雲鬟收

未得即是仙宮欲製六銖衣染絲未倩鮫人織采之

不敢盈筐篋苦把龍神河伯惜瓊玉鹽爛漫煮燕入
丹田續靈液會待功成挿翅飛蓬萊頂上尋仙客

蘇君廳觀韓幹馬障歌

杜甫歌詩吟不足可憐曹霸丹青曲直言弟子韓幹
馬一作畫畫馬無骨但有肉今日披圖見筆跡始知甫

也真凡目秦王學士居武功六印名家聲價雄乃孫
屈跡寧百里好奇學古有祖風竹廳斜日奕棋散延
我直入書齋中屹然六幅古屏上歛見胡人牽入天
廐之神龍麟鬣鳳臆真相似秋竹慘慘披兩耳輕勻

杏蓋糝皮毛細撚銀絲插鬃尾思量動步應千里誰
見初離渥洼水眼前只欠燕雪飛蹠下如聞朔風起
朱厓謫掾從亾歿更有何人鑒奇物當時若遇燕昭
王肯把千金買枯骨

張喬

楊花落

北斗南回春物老紅英落盡綠尚早韶風澹蕩無所
依偏惜垂楊作春好此時可憐楊柳花繁盈艷曳滿
人家人家女兒出羅幕淨掃玉除看花落寶環纖手

捧更飛翠羽輕裾承不著歷歷瑤琴舞袖陳飛紅拂
黛憐玉人東園桃李芳已歇猶有楊花嬌莫春

池上詩人

郡人劉廷鑾編

同學吳應夢較

五言律詩

張祜

富陽道中送王正夫

枿枿上荒原霜林赤葉翻孤帆天外出遠樹日中昏
摘橘防深刺攀蘿畏斷根何堪衰草色一酌送王孫

送韋正貫

一作字

赴制舉

可愛漢文年鴻恩蕩海壖木雞方備德金馬正求賢

大戰希游必長途在着鞭行看晁董策便向史中傳
贈貞固上人

南國披僧籍高標一道林律儀精毘布真行正吞針
撥火身潛起焚香口旋吟非論坐中社余亦舊知音
題贈志凝上人

悟色身無染觀空事不生道心長日笑覺路幾年行
片月山林靜孤雲海棹輕願爲塵外契一就智珠明
溪行寄京城故人

白日長多事清溪偶獨尋雲歸秋水濶月出夜山深
坐想天涯去行悲海畔吟京華故人在誰復念浮沉

送瓊貞發述懷

送出南溪日離情不忍看漸遙猶顧首帆去意難判
最恨臨行夜相期幾百般但能存歲節終久得同歡

送魏尚書赴鎮州行營

河塞日駸駸恩讎報盡深伍員忠是節陸績孝爲心
坐激書生憤行歌壯士吟慚非燕地客不得受黃金

洞庭南館

一迳逗霜林朱欄遶碧岑地盤雲夢角山鎮洞庭心

樹白看烟起沙紅見日沉
還因此悲屈惆悵又行吟
題贈仲儀上人院

星霜幾朝寺香火靜居人
黃葉不經意青山無事身
口生臺上日結座履中塵
自說一時課別來詩更新
登廣武原

廣武原西北華夷此浩然
地盤山入海河遠國連天
遠樹千門邑高檣萬里船
鄉心日云暮猶在楚城邊
訪許用晦

遠郭日曛曛停橈一訪君
小橋通野水高樹入江雲
酒興曾無敵詩情舊逸羣
怪來音信少五十我無聞
哭汴州陸大夫

利劍太堅操何妨拔一毛
冤深陸機霧憤積伍員濤
直道非無驗明時不錄勞
誰當青史上卒爲顯詞褒
晚夏歸別業

古岸扁舟晚荒園一徑微
鳥啼新果熟花落故人稀
宿潤侵苔甃斜陽照竹扉
相逢盡鄉老無復話時機
公子行

春色滿城池杯盤着處移
鐙金斜鴈子鞍帕嫩鶯兒

買笑開桃李尋歌折柳枝可憐明月夜長是管絃隨
江西道中作三首

日落江村遠烟雲幾度重問人孤驛路驅馬亂山峰
夜入霜林火寒生水寺鐘淒涼哭途意行處又饑凶

二

西江江上月遠遠照征衣夜色草中細秋聲林外機
渚田牛路熟石岸客船稀無復是鄉井鷓鴣聊自飛

三

秋灘一望平遠遠見山城落日啼鳥柏空林露寄生

燒畬殘火色盪漿夜溪聲况是曾游處荒田小變更

題常州水西館

隙地叢筠植修廊列堵環樓臺踈占水岡岸遠成山
盡日草深映無風舟自閒聊當俟芳夕一泛芰荷間

題李瀆山居五潭

古樹千年色蒼崖百尺陰髮寒泉氣靜神駭玉光沉
上穴青冥小中連碧海深何當烟月下一聽夜龍吟

題陸壩金沙洞居

東溪泉一眼歸臥愜高踈決水金沙靜梯雲石壁虛

細吟搔短髮深語笑長裾莫道遺名品嘗聞入洛初
題陸敦禮山居伏牛潭

伏牛真怪事余勝幾人語日彩沉青壁烟容靜碧潭
泛心何慮冷漱齒詎忘甘幸挈壺中物期君止興酣
旅次石頭岸

行行石頭岸身事兩相違舊國日邊遠故人江上稀
水聲寒不盡山色暮相依惆悵未成語數行鴉又飛
觀永州于使君家樂琵琶

歷歷四絃分重來上界聞玉盤飛夜電金磬入秋雲
隴霧笳凝水砂風雁咽羣不堪天塞恨青塚是昭君
箏

綽綽下雲烟微收皓腕鮮夜風生碧柱春水咽紅絃
翠珮輕猶觸鶯枝濕未遷芳音何更妙清月共嬋娟
吹

一夜列三清聞歌曲阜城雪飛紅燼影珠貫碧雲聲
皓齒嬌微發青蛾怨自生不知新弟子誰解轉喉輕
笙

董雙成一妙歷歷韻風篁清露鶴聲遠碧雲仙吹長

氣侵銀項濕膏殞
漆瓢香曲罷不知處
巫山空夕陽
五絃

小小月輪中
斜抽半袖紅
玉瓶秋滴水
珠箔夜懸風
徵調侵絃乙
商聲過指攏
只愁纔曲罷
雲雨去巴東

鬲篋

一管妙清商
纖紅玉指長
雪藤新換束
霞錦旋抽囊
併場聲猶遠
深含曲未央
坐中知密顧
微笑是周郎

笛

紫清人一管
吹在月堂中
雁起雪雲夕
龍吟烟水空

虜塵深漢地
羌思切邊風
試弄陽春曲
西園桃已紅

舞

荆臺呈妙舞
雲雨半羅衣
鳥鳥腰疑折
褰褰袖欲飛
霧輕紅躑躅
風艷紫薔薇
強許傳新態
人間弟子稀

笙篴

星漢夜牢牢
深簾調更高
亂流公莫度
沉骨嫗空嗥
向月輕輪甲
迎風重紉條
不堪聞別引
滄海恨波濤

簫

清籟遠悒悒
秦樓夜思深
碧空人已去
滄海鳳難尋

杳妙和雲絕，依微向水沉。還將九成意，高閣竚芳音。
夕次桐廬

百里清溪口，扁舟此去過。晚潮風勢急，寒葉雨聲多。
戍出山頭鼓，樵同竹裡歌。不堪無酒夜，回首夢烟波。
入潼關

都城三百里，雄險此迴環。地勢遙尊嶽，河流側讓關。
秦皇曾虎視，漢祖昔龍顏。何處梟兇輩，干戈自不閒。
南宮歎亦述，玄宗追恨太真妃事。

北陸冰初結，南宮漏更長。何勞却睡草，不驗反魂香。
月隱仙娥艷，風殘夢蝶揚。徒悲舊行跡，一夜玉堦霜。
題平望驛

一派吳興水，西來此驛分。路遙經幾日，身去是孤雲。
雨氣朝忙蟻，雷聲夜聚蚊。何看秋草色，到處重離羣。

隋宮懷古

廢宮深苑路，煬帝此東行。往事餘山色，流年是水聲。
古墻丹雘盡，深棟黑煤生。惆悵從今客，經過未了情。

偶蘇末至話別

幾年滄海別，萬里白頭吟。夜月江流濶，春雲嶺路深。

珠繁楊氏果翠耀孔家禽無復天南夢相思空樹林

秋霽

垂老歸休意栖栖陋巷中暗燈棋子落殘語酒瓶空
滴幕侵簷露虛踈入檻風何妨一蟬鳴自抱木蘭叢

詠史二首

漢代非良計西戎世世塵無何求善馬不筭苦生民
外國讎虛結中華憤莫論却教爲後恥昭帝遠和親

二

留名魯連去於世絕遺音盡愛聊城下寧知滄海深

偶然飛一箭無事在千金迴望凌烟閣何人是此心

答僧贈拄杖

千迴掌上橫珍重遠方情客問何人與閩僧寄一莖
畫空疑未決卓地計初成幸以文堪採扶持力不輕

塞下

萬里配長征連年慣野營入羣來揀馬拋伴云擒生
箭插鵬翎濶弓盤鵲角輕問看行近遠西去受降城

憶雲陽宅

一別雲陽宅深愁度歲華翠濃春檻柳紅滿夜庭花

鳥影垂纖竹魚行踐淺沙聊當因寤寐歸思浩無涯
題造微禪師院

夜香聞偈後岑寂掩雙扉照竹燈和雪穿雲月到衣
草堂踈磬斷江寺故人稀惟憶江南雨春風獨鳥歸
酬武蘊之乙丑之歲始見華髮余日悲遂成

繼和

賈生年尚少華髮近相侵不是流光促因緣別恨深
憐君成苦調感我獨長吟豈料清秋日星星共映簪
題萬道人禪房

何處鑿禪壁西南江上峰殘陽過遠水落葉滿踈鐘
世事靜中去道心塵外逢欲知情不動床下虎留踪
病較訪山客

久病倦衾枕獨行來訪君因逢歸馬客共對出溪雲
新月坐中見暮蟬愁處聞相歡貴無事莫想路岐分
題松汀驛

山色遠含空蒼茫澤國東海明先見日江白迥聞風
鳥道高原去人烟小徑通那知舊遺逸不在五湖中
處士隱居

斜日半飛閣高簾輕翳空清香芙蓉水碧冷琅玕風
絕岸孤泚狀修廊趾崇隆惟當餌仙木坐作朱顏翁

早春錢塘湖晚

落日下林坂撫襟睇前蹤輕澌流迥浦殘雪明高峰
仰視天宇曠俯登雲樹重聊當問真界昨夜西巒鐘

濠州水館

高閣去煩燠客心遂安舒清流中浴烏白石下游魚
秋樹色凋翠夜橋聲搗虛南軒更何待坐見玉蟾蜍

石頭城寺

一作遊清涼寺

山勢抱烟光重門突兀傍連簷金像閣半壁石龕廊
碧樹藪高頂清池占下方徒悲宦遊意盡日老僧房

傷遷客歿南中

故人何處歿謫宦極南天遠地身狼狽窮途事果然
白鬚纔過海丹旄却歸船腸斷相逢路新來客又遷

烏夜啼

忽忽南飛返危絲共怨悽暗霜移樹宿殘夜遠枝啼
咽絕聲重叙悒淫思乍迷不妨還報喜悞使玉顏低

題餘杭縣龍泉觀

杭一作姚

四顧山一面臺殿已嵯峨中路見山遠上方行石多
天晴花氣漫地暖鳥聲和徒漱葛仙井此生其柰何

題濠州鍾離寺

遙遙東郭寺數里占原田遠岫碧光合長淮清派連
院藏歸鳥樹鐘到落帆船惟羨空門叟栖心盡百年

題徑山大覺禪師影堂

超然彼岸入一徑謝微塵見相即非相觀身應是身
空門性未滅舊宅化猶新謾指堂中影誰言影似真
秋夜宿靈隱寺師上人

月色荒城外江聲野寺中貧知交道薄老信釋門空
露葉凋堦蘚風枝戛井桐不妨無酒夜閑話值生公

題蘇州靈巖寺

碧海西陵岸吳王此盛時山行今佛寺水見舊宮池
亡國人遺恨空門事少悲聊當值僧語盡日把松枝

題蘇州楞伽寺

樓臺山半腹又此一經行樹隔夫差苑溪連勾踐城
上波松徑澀深坐石池清况是西峰頂淒涼故國情

蘇州思益寺

四面山形斷樓臺此迥臨兩峰高崒岼一水下滄溟
鑿石西龕小穿松北塢深會當來結社長日爲僧吟

題重居寺

浮圖經近郭長日羨僧閑竹徑深開院松門遠對山
重廊標板榜高殿鎖金環更問尋雷空西行咫尺間

題善權寺

碧峰南一寺最勝是仙源峻坂依巖壁清泉泄洞門
金函崇寶藏玉樹閔靈根寄謝香花叟高蹤不可援

題南靈隱靜寺

松迳上登攀深行烟靄間合流厨下水對聳殿前山
潤壁鳥音迥泉源僧步閒更憐飛一錫天外與雲還

題丘山寺

幾代儒家業何年佛寺碑地平邊海處江出上山時
故國人長往空門事可知淒涼問禪客身外即無爲

題道光上人山院

真僧上方界山路正巖巖地僻泉長冷亭香草不凡
火田生白菌烟岫老青杉盡日惟山水當知律行嚴

贈廬山僧

一室鑪峰下荒榛手自開粉牌新薤葉竹援小葱臺
樹黑雲歸去山明日上來便知心是佛豎坐對寒灰

題惠山寺

舊宅人何在空門客自過泉聲到池盡山色上樓多
小洞生斜竹重塔夾細莎殷勤望城市雲水暮鐘和

題虎丘寺

輕棹駐迴流門登西虎丘霧青山月曉雲白海天秋
倚殿松株澁歌庭石片幽青蛾幾時墓空色尚悠悠

題普賢寺

何人知寺路松竹暗春山潭黑龍應在巢空鶴未還
經年來客倦半日與僧閒更共嘗新茗聞鐘笑語間

題虎丘東寺

雲樹擁崔嵬深行異俗挨寺門山外入石壁地中開
仰砌池光動登樓海氣來傷心萬里意金玉葬寒灰

題虎丘西寺

翼塵楚城外一寺枕通波松色入門遠岡形連院多
花時長到處別路半經過惆悵舊禪客空房深薜蘿

題招隱寺

千年戴顓宅佛廟此崇修古井人名在清泉鹿跡幽
竹光寒閉院山影夜藏樓未得高僧旨烟霞空暫游

塞下曲

二十逐嫖姚分兵遠戍遼雪迷經塞夜冰壯渡河朝
促放鷗難下生騎馬未調小儒何足問看取劍橫腰

宿淮陰水館

積水自成陰昏昏月映林五更離浦棹一夜隔淮砧
漂母鄉非遠王孫道豈沉不當無律姬誰肯効前心

題小松

何處斲雲烟新移此館前碧姿塵不染清影露長鮮
聳地心纔直凌雲操未全可悲人自老何日是千年

夏日梅溪館寄龐舍

東陽賓禮重高館望行期掃簟因松葉蓼瓜使竹枝
捲簾聞鳥近翻枕夢人遲坐聽津橋說今營太守碑

感河上兵

一聞河塞上非是欲權兵首尾誠須畏膏肓慎勿輕
多門徒可入畫室可思行莫爲無媒者滄浪不濯纓

贈淮南將

年少好風情垂鞭眦睚行帶金獅子小裘錦麒麟
揀匠裝銀鐙堆錢買細箏李陵雖効死時論亦輕生

題會昌上人會一作慧

半岩開一室香燧細氤氳石上漱秋水月中行夏雲
律持僧講疏經誦梵書文好是風廊下遙遙挂褐裙

塞上曲

邊風捲地時日暮帳初移磧迥三通角山寒一點旗
連收榻索馬引滿射鷗兒莫道功勳細將軍昔戍師

晚秋江山作

萬里窮愁客蕭條對落暉煙霞山鳥散風雨廟神歸
地遠蛩聲切天長雁影稀那堪正砧杵幽思想寒衣

中秋月

碧落桂含姿清秋是素期一年逢好夜萬里見明時
絕域行應久高城更下遲人間繫情事何處不相思

題曾氏園林

十畝長堤宅蕭疎半老槐醉眠風捲簾棋罷月移塔
斫樹遺桑斧澆花濕笋鞋還將齊物論終歲自安排

貴池道中

羸驂驅野岸山遠路盤盤
清露月華曉碧江星影寒
離郡徒長泣去國日加餐
霄漢寧無舊相哀是語端
將之衡陽道中

萬里南方去扁舟泛自身
長年無愛物深話少情人
醉卧襟長散閒書字不真
衡陽路猶遠獨與鴈爲賓

題真娘墓

佛地葬羅衣孤魂此是歸
舞爲蝴蝶夢歌謝伯勞飛
翠髮朝雲在青蛾夜月微
傷心一花落無復怨春暉

題蘇小小墓

漠漠窮塵地蕭蕭古樹林
臉濃花自發眉憾柳長深
夜月人何待春風鳥自吟
不知誰共穴徒願結同心

賦昭君塚

萬里關山塚明妃舊死心
恨爲秋色晚愁結暮雲陰
夜切胡風起天高漢月臨
已知無玉貌何事送黃金

江南作一作江上旅泊

楚塞南行久秦城北望遙
少年花已過衰病柳先凋
客淚收迴日鄉心寄落潮
殷勤問春鴈何處是烟霄

與前題多道侶二字結句亦少異

溪行寄京師故人道侶

羸驂驅野岸山遠路盤盤
清露月華曉碧江星影寒
離郡徒長泣去國日加餐
霄漢寧無舊相哀是語端
將之衡陽道中

萬里南方去扁舟泛自身
長年無愛物深話少情人
醉卧襟長散閒書字不真
衡陽路猶遠獨與鴈爲賓

題真娘墓

佛地葬羅衣孤魂此是歸
舞爲蝴蝶夢歌謝伯勞飛
翠髮朝雲在青蛾夜月微
傷心一花落無復怨春暉

題蘇小小墓

漠漠窮塵地蕭蕭古樹林
臉濃花自發眉憾柳長深
夜月人何待春風鳥自吟
不知誰共穴徒願結同心
賦昭君塚

萬里關山塚明妃舊死心
恨爲秋色晚愁結暮雲陰
夜切胡風起天高漢月臨
已知無玉貌何事送黃金

江南作

一作江上旅泊

楚塞南行久秦城北望遙
少年花已過衰病柳先凋
客淚收迴日鄉心寄落潮
殷勤問春鴈何處是烟霄
溪行寄京師故人道侶

白日長多事清溪偶獨尋雲歸秋水濶月出夜山深
坐想天涯去行悲澤畔吟東郊故人在應笑未抽簪

送楊秀才遊蜀

鄂渚逢遊客瞿塘上去船峽深明月夜江靜碧雲天
舊俗巴渝舞新聲蜀國絃不堪揮慘恨一涕自潸然

送楊秀才往夔州

鄂渚逢遊客瞿塘上去船南連萬里海狹入一條天
鳥影沉沙日猿聲隔樹烟新詩逢北使爲造幾巴戩

送曾黯遊夔州

不遠夔州路層波灩澦連下來千里峽入去一條天
樹色秋帆上灘聲夜枕前何堪正危側百丈半山巔

送李長史歸涪州

涪江江上客歲晚却還鄉暮過高唐雨秋經巫峽霜
急灘船失次疊嶂樹無行好爲題新什知君思不常

送韋整尉長沙

遠遠長沙去憐君利一官風帆彭蠡疾雲水洞庭寬
木提蔬束江烏接飯丸莫言卑濕地未必乏新歡

送沈下賢謫尉南康

秋風江上草先是客心推萬里故人去一行新雁來
山高雲緒斷浦迴日波頽萬怪南康遠相思不可裁

憲宗皇帝挽歌詞

嗚咽上攀龍昇平不易逢武皇虛好道文帝未登封
壽域無千載泉門是九重橋山非遠地雲去莫疑峰

讀始興公傳

歿世議方存昇平道幾論詩情光日月筆力動乾坤
亂首先雄算朝綱在典墳明時封禪績山下見堠門

讀狄梁公傳

失運廬陵厄乘時武后尊五丁扶造化一柱正乾坤
上保儲皇位深然國老勲聖朝雖百代長合問王孫

走筆贈許玖赴桂州命

桂林真重德蓮幕藉殊才直氣自消瘴遠心無慙灰
劍稜叢石險箭激亂流迴莫說雁不到長江魚盡來

送盧弘本浙東覲省

東望故山高秋歸值小舸懷中陸績橘江上伍員濤
好去寧雞口加餐及鱗蝦知君思無倦爲我續離騷

送外甥

衰年生姪少惟爾最關心偶作魏舒別聊爲殷浩吟
白波舟不定黃葉落難尋自此尊中物誰當更共斟

途中逢李道實遊蔡州

送出南溪日離情不忍看漸遠猶顧首帆去意難判
最恨臨行夜相期幾百般但能存歲節終久得同歡

陪范宣城北樓夜讌

華軒敞碧流官妓擁諸侯粉項高叢鬢檀粧慢裹頭
亞身催臘燭斜眼送香毬何處偏堪恨千迴下客籌

樂靜

引手強簪巾徐徐起病身遠心羣野鶴閑話對村人
發匣琴徽靜開瓶酒味真縱聞兵賦急原憲本家貧

寄盧載

故人盧氏子十載曠佳期少見雙魚信多聞八米詩
侏儒他甚飽款段爾應羸勿謂今劉二相逢不熟樵

寄朗州徐員外

江嶺昔飄蓬人間值俊雄關西今孔子城北舊徐公
清夜遊何處良辰此不同傷心幾年事一半在湖中

贈薛鼎臣侍御一作送劉崇德尉睦州建德縣

一命前途遠雙曹小邑間夜潮人到郭春霧鳥啼山
淺瀨橫沙堰高巖峻石班不堪曾倚棹猶復夢昇攀

酬鄭模司直見寄

模一作樸

故人滄海曲聊復話平生喜是狂奴態羞爲老婢聲
官途終日薄身事長年輕猶賴書千卷長隨一棹行
奉和令狐相公送陳肱御史

高館動離琴親賓聊歎稀笑歌情不盡歡待禮無違
清露府蓮結碧雲臯鶴飛還家與惠雨露豈殊歸

旅次上饒溪

碧溪行幾折凝棹宿汀沙角斷孤城掩樓深片月斜
夜橋昏水氣秋竹靜霜華更想曾題壁凋零可歎嗟

送蘇紹之歸嶺南

孤舟越客吟萬里曠離襟夜月江流濶春雲嶺路深
珠繁楊氏果翠耀孔家禽無復天南夢相思空樹林
喜王子載話舊

相逢青眼日相歎白頭時累話三朝事重看一局棋
歡娛非老大成長是嬰兒且盡尊中物無煩更後期

寄遷客

萬里南邊路辛勤
嶺路遙溪行逢水
弩野店避霜魘
瘴海須求藥貪泉
莫舉瓢但能堅志
義白日甚昭昭

寄徐彥夫南遷

萬里客南遷孤城漲海邊
瘴雲秋不斷陰火夜長然
月上行虛市風迴望舶船
知君還自潔更爲酌貪泉

秋日病中

析析簷前竹秋聲拂簟涼
病加陰已久愁覺夜初長
坐拾車前子行看肘後方
無端憂食忌開鏡倍萎黃

贈契衡上人

小門開板閣終日是逢迎
語笑人同坐修持意別行
水花秋始發風竹夏長清
不悵恹惶久憐師記姓名

贈僧雲栖

塵尾與筇杖幾年離石壇
梵餘林雪厚棋罷岳鐘殘
開卷喜先悟漱瓶知早寒
衡陽寺前雁今日到長安

毀浮屠年逢東林寺舊僧

可惜東林寺空門失所依
翻經謝靈運畫壁陸探微
隙地泉聲在荒途馬跡稀
殷勤話僧輩未敢保儒衣

寄靈澈上人

老僧何處寺秋夢繞江濱獨樹月中鶴孤舟雲外人
榮華長指幻衰病久觀身應笑無成者滄洲垂一綸

吳宮曲

日下苑西宮花飄香徑紅玉釵斜白燕羅帶弄青蟲
皓齒初含雪柔枝欲斷風可憐傾國艷誰信女爲戎

題上饒亭

溪亭拂一琴促軫坐披衿夜月水南寺秋風城外砧
早霜紅葉靜新雨碧潭深唯是壺中物憂來且自斟

題樟亭

曉霽憑虛檻雲山四望通池盤江岸絕天映海門空
樹色連秋靄潮聲入夜風年年此光景催盡白頭翁

題程氏書齋

僻巷難通馬深園不藉籬青蘿纏栢葉紅粉瑞蓮枝
雨燕啣泥近風魚呖網遲緣君尋小阮好是更題詩

江城晚眺

重檻構雲端江城四鬱盤河流出郭靜山色對樓寒
浪草侵天白霜林映日丹悠然此江思樹杪幾檣竿

晚次荆溪館呈崔明府

艤舟陽羨館飛步繚踈楹山暝水雲碧月涼煙樹清
長橋深漾影遠櫓下搖聲况是無三害絃歌初政成

洞庭南館

一逕逗霜林朱欄遠碧岑地盤雲夢角山鎮洞庭心
樹白看煙起沙紅見日沉還因此悲屈惆悵又行吟

題海鹽南館

故人營此地臺館尚依依黑夜山魈語黃昏海燕歸
舊陰楊葉在殘雨槿花稀無復南亭賞高簷紅燭輝

題潤州金山寺

超然離世羣一作微茫水國

一宿金山寺超然離世羣僧歸夜船月龍出曉堂雲
樹色中流見鐘聲兩岸聞翻思在朝市終日醉醺醺

題潤州甘露寺

千重構橫險高步出塵埃日月光先見江山勢盡來
冷雲歸水石清露滴樓臺况是東溟上平生意一開

題杭州孤山寺

樓臺聳碧岑一徑入湖心不雨山長潤無雲水自陰
斷橋荒蘚澀空院落花深猶憶西牕月鐘聲在北林

題贈仲儀上人院

重7星霜幾朝寺香火靜居人黃葉不經意青山無事身
口生臺上日座結履中塵自說一時課別來詩更新

題丹陽永泰寺練湖亭

小檻俯澄鮮龍宮浸浩然孤光懸夜月一片割秋天
淺派殫沙草餘波漂岸船聊當因畝澮披拂坐潺湲

題僧壁

出門無一事忽忽到天涯客地多逢酒僧房却厭花
碁因王粲覆鼓是禰衡榻自喜疎成品生前不怨嗟

題聖女廟

古廟無人入蒼皮澀老桐蟻行蟬殼上蛇竄雀巢中
淺水孤舟泊輕塵一座蒙晚來雲雨去荒草是殘風

觀獵

殘獵渭城東蕭蕭西北風雪花鷹背上冰片馬啼中
臂掛捎荆兔腰懸落箭鴻歸來逞餘勇兒子亂彎弓

觀徐州李司空獵

曉出郡城東分圍淺草中紅旗開向日白馬驟迎風
背手抽金簇翻身控角弓萬人齊指處一雁落寒空

題山水障子

一見秋山色方憐畫手稀
波濤連壁動雲物下簷飛
嶺樹冬猶發江帆夜不歸
端然是漁叟相向日依依

題王右丞山水障子二首

精華在筆端咫尺匠心難
日月中堂見江湖滿座看
夜凝嵐氣濕秋浸碧光寒
料得昔人意平生詩思殘

二

右丞今已歿遺畫世間稀
咫尺江湖畫尋常鳴鳥飛
山光全在掌雲氣欲生衣
以此常爲玩平生滄海機

觀宋州田大夫打毬

白馬頓紅纓梢毬紫袖輕
曉冰蹄下裂寒瓦杖頭鳴
叉手膠粘去分鬃線道
絝自言無戰伐髀肉已曾生

鸚鵡

棲棲南越鳥色麗思沉
淫暮隔碧雲海春依紅樹林
雕籠悲歛翅畫閣豈關心
無事能言語人間怨恨深

再吟鸚鵡

萬里去心違奇毛覺自非
美人憐解語凡鳥畏多機
未勝無丹嘴何勞事綠衣
雕籠終不戀會向故山歸

洞房燕

清曉洞房開佳人喜燕來乍疑釵上動輕似掌中迴
暗語臨牕戶深窺傍鏡臺粧成正含思莫拂畫梁埃

鷓鴣

深窺思不窮揭趾淺沙中一點山光淨孤飛潭影空
暗棲松葉露雙下蓼花風好是滄波侶垂絲趣亦同

詠風

搖搖歌扇舉悄悄舞衣輕引笛秋臨塞吹沙夜遶城
向峰迴雁影出峽送猿聲何似琴中奏依依別帶情
發蜀客

風吹魯國人飄蕩蜀江濱濕地饒蛙黽衰年足鬼神
時清歸去路日復病來身千萬長堤柳從他爛熳春

王季文

青出藍

芳藍滋尺帛人力半天經浸潤加新氣光輝勝本青
還同冰出水不共草爲螢翻覆依襟上偏知造化靈

費冠卿

秋日與冷然上人寺莊觀稼

世人從擾擾獨自愛身閑美景當新霽隨僧過遠山

村橋出秋稼空翠落澄灣惟有中林犬猶應望我還
張喬

華山

誰將倚天劍削出倚天峰衆水背流急他山相向重
樹粘青靄合崖夾白雲濃一夜盆傾雨前秋起毒龍

郢州即事

孤城臨遠水千里見寒山白雪無人唱滄洲盡日閑
鳥歸殘燒外帆出斷雲間此地秋風起應隨計吏還
青鳥泉

抵此沉仙翼瑤池似不遙有聲懸翠壁無勢不丹霄
浮瀨烟霞古寒原草木凋山河幾更變幽咽到唐朝
送友人入蜀

此心知者稀欲別倍相依無食擬同去有家還未歸
巴山開國遠劍道入天微必恐臨邛客疑君學賦非

書邊事

詩中向南流一作向春流

調角斷清秋征人倚戍樓春風對青塚白日落梁州
大漢無兵阻窮邊有客遊蕃情似此水長願向南流

贈邊將

將軍誇胆氣功在殺人多對酒擎鍾飲臨風拔劍歌
翻師平碎葉掠地取交河應笑孔門客年年羨四科

送龍門令劉滄

去宰龍門縣應思變化年還將魯儒政又與晉人傳
峭壁開中古長河落半天幾鄉因勸勉耕稼滿雲烟

送龐百篇之任青陽縣尉

都堂公試日詞翰獨超羣品職台庭與篇章聖主聞
鄉連三楚樹縣對九華雲多少青門客臨岐共羨君

劉補闕自九華山拜官因以寄獻

冥鴻久不羣徵拜動天文地主迎過郡山僧送出雲
登車殘月在宿館亂流分若更思林下還須共致君

送賓貢金夷吾奉使歸本國

渡海登仙籍還家備漢儀孤舟無岸泊萬里有星隨
積水浮魂夢流年半別離東風未迴日音信杳難期

秘省伴直

喬枝聚暝禽疊閣鎖遙岑待月當秋直看書廢夜吟
殘薪留火細古井下瓶深縱欲抄前史貧難遂此心

聽琴

清月轉遙軫弄中湘水寒能令坐來客不語自相看
靜恐鬼神出急疑風雨殘幾時歸嶺嶠更過洞庭彈

宿昭應

憶開元事淒涼里巷間薄烟通魏闕明月照驪山
半壁空宮閉連天白道閑清晨更回首獨向灞陵邊

送鄭谷先輩赴汝州辟命

看花興未休已散曲江遊載筆離秦甸從軍過洛州
嵩雲將雨去汝水背城流應念依門客蒿萊滿徑秋

送鄭侍御赴汴州辟命

官從諫署清暫去佐戎旌朝客多相戀吟僧欲伴行
河水天際白嶽雪眼前明即是東風起梁園聽早鶯

寄處士梁燭

賢哉君子風諷與古人同採藥楚雲裡移家湘水東
星霜秋野闊雨雹夜山空早晚相招隱深耕老此中

送友人許棠

離鄉積歲年歸路遠依然夜火山頭市春間樹杪船
干戈愁髮改瘡癘喜家全何處營甘旨潮濤浸薄田

江行至沙浦

烟霞接杳冥旅泊寄迴汀夜雨雷電歇春江蛟蜃腥
城侵潮影白嶠載鳥行青徧欲探泉石南須過洞庭

長安書事

出送鄉人盡滄洲未得還秋風五陵樹晴日六街山
有景終年住無機是處閑何當白雲外免老別離間

北山書事

黃河一曲水天半鑠重關聖日雄藩靜秋風老將閑
車輿穿谷口市井響雲間大野無飛鳥元戎較獵還

岳陽即事

遠色岳陽樓湘帆數片愁竹風山上路沙月水中洲
力學桑田廢思歸鬢髮秋功名如不立豈易狎汀鷗

浮汴東歸

日暖泗濱西無窮岸草齊薄煙衰草樹微月迴城雞
水近滄浪急山隨綠野低羞將舊名姓還向舊遊題

送友人歸江南

辛勤同失意迢遞獨還家落日江邊笛殘春山上花
親安誠可喜道在亦何嗟誰伴高吟處晴天望九華

送友人歸宜春

落花兼柳絮無處不紛紛
遠道空歸去流鶯獨自聞
野橋喧磴水山郭入樓雲
故里南陔曲秋期更送君

弔建州李員外

銘旌歸故里猿鳥亦淒然
已葬桐江月空迴建水船
客傳爲郡政僧說讀書年
恐有吟魂在深山古木邊

弔造微上人

至人隨化往遺路自堪傷
白塔收真骨青山閉影堂
鐘殘含細韻烟滅有餘香
松上齊烏在遲遲互夕陽

送許棠下第遊蜀

一作送友人遊蜀

天下猿多處西南是蜀關
馬登青壁瘦人宿翠微閑
帶雨逢殘日因江見斷山
行歌風月好莫老錦城間

送許棠及第歸宣州

雅調一生吟誰爲晚達心
傍人賀及第獨自却霑襟
宴別喧天樂家歸礙日岑
青門許攀送故里接雲林

贈敬亭清越上人

敬一作鏡

海上獨隨緣歸來二十年
久閑時得句漸老不離禪
砌木歌臨水牕峯直倚天
猶期向雲裡別掃石床眠

聞仰山禪師住曹溪因贈

曹溪松下路猿鳥重相親
四海求玄理千峯遠定身
異花天上墮靈草雪中春
自惜經行處焚香禮舊真

送僧雅覺歸東海

山川心地內一念即千重
老別關中寺秋歸海外峰
鳥行來有路帆影去無蹤
幾夜波濤息先聞本國鐘

弔栖白上人

今古遞相送幾時無逝波
篇章應不朽寂滅理如何
內殿留真影閑房落貝多
高塔寺惆悵懶經過

滕王閣

一作滕王閣寫望起句曰創來人世
久幾度繞汀廬餘句悉同

昔人登覽處遺閣大江隅
疊浪有時有閑雲無日無
早涼先燕去返照後帆孤
未得營歸計菱歌滿舊湖

經隱巖舊居

夜久村落靜徘徊楊柳津
青山猶有路明月已無人
夢寐空前事星霜倦此身
當期結茅處來往躡遺塵

題鄭侍御藍田別業

秋山清若水吟客靜於僧
小徑通商嶺高牕見杜陵
雲霞朝入境猿鳥夜窺燈
許作前峰侶終來寄上層

遊華山雲際寺

少華中峯寺高秋衆景歸地連秦塞起河翻晉山微
晚木蟬相應涼天鴈並飛殷勤記巖石祇恐再來稀

題靈山寺

樹涼清島寺虛閣敞禪扉四面閒雲入中流獨鳥歸
湖平幽徑近船泊夜燈微一宿秋風裡烟波隔擣衣

題興善寺僧道深院

江峯峯頂人受法老西秦法本無前業禪非爲後身
院栽他國樹堂展祖師真甚願依宗旨求閑未有因
雨中宿僧院

千燈有宿因長老許相親永夜樓臺雨更深江海人
勞僧無日忘念起微塵不是真如理何門靜此身

遊終南白鶴觀

上徹鍊丹峰求玄意未窮古壇青草合往事白雲空
仙境日月外帝鄉烟霧中人間足煩暑欲去戀清風
送棋待詔朴球歸新羅

海東誰敵手歸去道應孤闕下傳新勢船中覆舊圖
窮荒迴日月積水載寰區故國多年別桑田復在無
和薛監察題興善寺古松

種種近王城前朝古寺名瘦根盤地遠香吹入雲清
鶴動池臺影僧禪雨雪聲者來人旋老因此嘆浮生

曲江春

尋春與送春多遠曲江濱一片鳧鷖水千秋輦轂塵
岸涼隨衆木波影逐遊人自是遊人老年年管吹新

春原春望

無窮名利塵軒蓋逐年新北闕東堂路千山萬水人
雲離僧榻曙燕遠鳳樓春荏苒文明代難歸釣艇身

荆楚道中

前程曾未到岐路儼何爲返照行人急荒郊去鳥遲
春宵多旅夢夏閏遠秋期處處牽愁緒無窮是柳絲

送人歸江南

貧歸無定程水宿與山行未有安親計難爲去國情
島烟孤寺磬江月遠船箏思苦秋迴日多應吟更清

送睦州張參軍

重祿輕身日清資近故鄉因知送君後轉自惜年芳
遠水分林影層峯起鳥行扁舟此中去溪月有餘光

遊南岳

入巖仙境清行盡復重行若得閑無事長來寄此生
澗松閑易老籠燭晚生明一宿泉聲裏思鄉夢不成

山中冬夜

寒葉風搖盡空林鳥宿稀澗冰妨鹿飲山雪阻僧歸
夜坐塵心定長吟語力微人間去多事何處夢柴扉

藍溪夜坐

藍水警塵夢夜吟開草堂月臨山靄薄松滴露花香
詩外真風遠人間靜興長明朝訪禪侶更上翠微房

秋夕

春恨復秋悲秋悲難到時每逢明月夜長起故山思
巷僻行吟遠蛩多獨卧遲溪僧與樵客動別十年期

終南山

帶雪復銜春橫天占半秦勢奇看不定景變馮難真
洞遠皆通岳川多更有神白雲幽絕處自古屬樵人
隱巖陪鄭少師夜坐

幸喜陪騶馭頻來向此宵硯磨青澗石厨爨白雲樵
竹外村烟細燈中禁漏遙衣冠與文理靜話對前朝

江上逢進士許棠

詩人誰上第新榜又無君鶴髮他鄉老漁歌故國聞
平江流曉月獨島絳餘雲且了髫年志沙鷗未可羣

贈仰山禪師

仰山因久住天下仰山名井邑身雖到林泉性本清
野雲看處盡江月定時明髣髴曾相識今來隔幾生

贈初上人

竹色覆禪棲幽禽遶院啼空門無去住行客自東西
井氣春來歇庭枝雪後低相看念山水盡日話曹溪

贈碁僧侶

詩中起一作出

機謀時未有多向奕碁銷已與山僧敵無令海客饒
靜驅雲陳起踈點鴈行遙夜雨如相憶松牕更見招

送龍羅僧

詩中落一作捲

東來此學禪多病念佛緣把錫離巖寺收經上海船
落帆敲石火宿島汲瓶泉永向扶桑老知無再少年

送僧鸞歸蜀寧親

歌詩精外學夫子是知音坐夏宮鐘近寧親劍閣深
高明徹西國舊寄積東林自此棲禪者因師滿蜀吟

尋桃源

武陵春草齊花影隔澄溪路遠無人去山空有鳥啼
水垂青靄斷松偃綠蘿低世上迷途客經茲盡不迷

書梅福殿壁二首

梅真從羽化萬古是須臾此地名空在西山雲亦孤
井痕平野水壇級上春燕縱有雙飛鶴年多松已枯

二

一自白雲去千秋壇月明我來思往事誰更得長生
雅韻鐘磬遠真風樓殿清今來爲尉者天下有仙名

題古觀

急景遽衰老此經誰養真松留千載鶴碑隔六朝人
洞水流花草壺天閉雪春其如爲名利歸踏五陵塵

寄中岳顓頊先生

先生顓頊後得道言何人松柏早於壽兒孫老却身
夜牕峰頂曙寒澗洞中春戀此逍遙景雲間不可親

送陸處士

尊前放浩歌便起泛烟波舟楫故人少江湖明月多
孤峰經宿上僻寺共雲過若向仙巖住還應著薜蘿

送韓處士歸少室山

詩中寒一作新

江外歷千岑還歸少室吟地閑緱嶺月牕迥洛城砧
石竇垂寒乳松枝長別琴他年瀑泉下亦擬置家林

題簡山人

名利了無時何人暫詣師道情閑外見心地語來知
竹落忽穿葉松寒蔭井枝匡山許同社願卜挂帆期

贈別李山人

分合老西秦年年夢白蘋曾爲洞庭客還送洞庭人
語別惜殘夜思歸愁見春滄浪濯纓處應念滿衣塵

題山僧院

谿路曾來日年多與舊同地寒松影裏僧老磬聲中
遠水清風落閑雲別院通心源若無礙何必更論空

遊歙州興唐寺

山橋通絕境到此憶天台竹裏尋幽徑雲邊上古臺
鳥歸殘照出鐘斷細泉來爲愛澄溪月因成隔宿迴

題詮律師院

詩中猶一作還

院涼松雨聲相對有山情未許谿邊老猶思嶽頂行
紗燈留火細石井灌瓶清欲問吾師外何人得此生

金山寺空上人院

已老金山頂無心上石橋講移三楚遍梵譯五天遙
板 疑秋月銅瓶汲夜潮自慙昏醉客來坐亦通宵

題廣信寺

亭北敞靈溪林梢與檻齊野雲來影遠沙鳥去行低
晚渡明村火晴山響郡鼙思鄉值搖落賴不有猿啼

甘露寺僧房

臨水登山路重尋旅思勞竹陰行處密僧臘別來高
遠岫明寒火危樓響夜濤悲秋不成寐明月上千艘

題友人林齋

喬木帶源涼疑作蟬來吟暑雨天不離高枕上似宿遠
山邊簾冷牕中月茶香竹裏泉一作吾廬近溪島憶
別動經年

宿江叟島居

一家烟島隈竹裏夜牕開數派分湖去千檣聚月來
石樓雲斷續澗渚鴈徘徊了得平生志還歸築釣臺

潯陽村舍

荒林寄遠居坐卧 樵漁夜火隨船遠寒更出郡踈
雪迷登岳路風阻轉江 寂寞高牕下思鄉歲欲除

江村

貧遊無定蹤鄉信轉難逢寒渚暮烟闊去帆歸思重
湖平低樹火木落遠山鐘况是漁家宿踈籬響夜春

蟬

先秋蟬一悲長是客行時曾感去年者又鳴何處枝
細聽殘韻在迴望舊聲遲斷續誰家樹涼風送別離

寄南中友人

相夢如相見相思去後頻舊時行處斷華髮別來新
浪動三湘月烟藏五嶺春又無歸北客書札寄何人

寄績溪陳明府

古邑猿聲裏空城只半存斥移無舊路沙漲別成村
鼓角喧京口山江盡汝墳六朝興廢地行子一銷魂

送南陵尉李頻

重作東南尉生涯尚似僧客程淮館月鄉思海船燈
曉霧看春穀晴天見朗陵不應三考足先授詔書徵

送沈先輩尉昭應

餘才不廢詩佐邑喜閑司丹陛終須去青山未可期
葉凋溫谷晚雲出古宮遲若草東封疏君王到有時

送友人遊湖南

所投非舊知亦似有前期
向路長江上揚帆細雨時
春生南嶽早日轉大荒
遲盡采瀟湘句重來會近期
送前輩讀三傳任長城尉

登科精魯史作尉及良時
高論窮諸國長才併幾司
地傾流水疾山疊過雲遲
暇日琴書伴何人對手棋

江上送友人南遊

何處積鄉愁天涯聚亂流
岸長羣岫晚湖闊片帆秋
買酒過漁舍分燈與釣舟
瀟湘見來雁應念獨邊遊

送友人遊蜀

詩中西過第一作西南過

劍閣緣空去西過第幾州
丹霄行客語明月杜鵑愁
露帶山花落雲隨野水流
相如曾醉地莫戀少年遊

送友人北遊

詩中安知一作長安

東歸未遂心北去幾沉吟
把酒思鄉遠投文入塞深
晉山擎白道汾水截青林
想見連天雪安知是積霖
送友人及第歸江南

豈易及歸榮辛勤致此名
登車思往事回首勉諸生
路遠山光曙帆通海氣清
秋期却閑坐林下聽江聲

送海東朴克

天涯離二紀闕下歷三朝
漲海雖然闊歸帆不覺遙
驚波時失侶舉火夜相招
來往尋遺事秦皇有斷橋

送友人歸宣州

失計復離愁君歸我舊遊
亂花藏道發春水遶鄉流
暝火叢橋市晴山疊郡樓
無爲謝公戀吟過晚蟬秋

江南別友人

勞生故白頭白頭未應休
闕下難孤立天涯尚旅遊
聽猿吟島寺待月上江樓
醉別醒惆悵雲帆滿亂流

商山道中

春去計秋期長安在夢思
多逢山好處少值客行時
雲起爭風勢花交隱澗枝
停驂一惆悵應祇嶺猿知

江行

江風木落天行子感流年
萬里波連蜀三更雨到船
夢殘燈影外愁積葦藪邊
不是貪名利家無負郭田

吳江旅次

行人愁落日去鳥倦遙林
曠野鳴流水空山響莫砧
旅徒歸計晚鄉樹別年深
寂寞逢村酒漁家一醉吟

東歸有感

東風搖衆木，即又見花期。
紫陌頻來日，滄江獨去時。
郡因兵役苦，家爲海翻移。
未老多如此，邽堪髮不衰。
重一作吳送金夷魚一作奉使歸本國

渡海登仙籍，還家備漢儀。
孤舟無斥泊，萬里有星隨。
積水浮魂夢，流年半別離。
東風未迴日，音信杳難期。

經宣城元員外山居

無人襲仙隱，石室閉空山。
辟燒猿猱到，隨雲鶴不還。
澗荒巖影在，橋斷樹陰閑。
但有黃河賦，長留在世間。

經九華山費徵君故居

故一作山

草堂蕪沒後來往，問樵翁斷石荒林外。
孤墳晚照中，數溪分大野。
九子立寒空，烟壁曾行處。
青雲路不通。

江樓作

馮檻見天涯，非秋亦可悲。
晚天帆去疾，春雪燕來遲。
山水分鄉縣，干戈足別離。
南人廢耕織，早晚罷王師。

題賈島吟詩臺

吟魂不復遊臺亦，似荒拉一徑。
草中出長江，天外流暝烟。
寒鳥集殘月，夜蟲愁願得生。
禾黍鉏平恨，即休。

回鑿閣寫望

古閣上空半寥寥千里心多年爲客路盡日倚欄吟
微壓秦川重深來虜塞回鑿今不見烟霞杳沉沉

題友人草堂

空山卜隱初生計亦無餘三畝水邊竹一牀琴畔書
深林收晚果絕頂拾秋蔬堅話長如此何年獻子虛

塞下曲

勒兵遼水邊風急捲旌先絕塞陰無草平沙去盡天
下營看斗建傳號信狼煙聖代垂青史當書破虜年

贈友人

九霄無詔下何事觸青塵宅帶松蘿僻田惟猿鳥親
吟看仙掌月期有洞庭人莫問烟霞句縣知見岳神
再題敬亭清越上人山房

重來訪惠休已是十年遊向水千松老空山一磬秋
石牕清吹入河漢夜光流久別多新作長吟洗俗愁
重送友人往江南

落花兼柳絮無處不紛紛遠道空歸去流鶯獨自聞
野橋喧磴水山郭入樓雲故里南陔曲秋期更送君

沿漢東歸

北去窮秦塞南歸遠漢川
深山逢古跡遠道見新年
絕壁雲銜寺空江雪灑船
縈迴還此景多坐夜烟前
重送蜀客詩中西南轉一作西過第

劍閣緣空去西南轉幾州
丹霄行客語明月杜鵑愁
露帶山花落雲隨野水流
相如曾醉地莫滯少年游

塞上詩後二聯一作下營看斗建傳號信狼烟聖代垂青史當書破虜年

勒兵遼水邊風急捲旌旗
絕塞寒無樹平沙勢盡天
雲晴迴探騎月落控鳴絃
永定山河誓南歸改漢年

思宜春寄友人

勝遊雖隔年魂夢亦依然
瀑水喧秋思孤燈動夜船
斷虹全嶺雨斜月半谿煙
舊日吟詩侶何人更不眠

江南逢洛下友人

洛下吟詩侶南遊只有君
波濤歸路見蟋蟀在船聞
曉月江城出晴霞島樹分
無窮懷古意豈獨遠湘雲

東湖贈僧子蘭

名利了無時何人暫訪師
道情閑外見心地語來知
竹落穿牕葉松寒蔭井枝
匡山許同社願卜挂帆期

李道士歸南嶽

千峰隔湘水迢遞挂帆歸掃月眠蒼壁和雲著褐衣
洞虛縣溜滴徑狹長松圍只恐相尋日人間舊識希

延福里秋懷

終年九陌行要路跡皆生苦學猶難至甘貧豈有成
病携秋卷重閑著暑衣輕一別林泉久中宵御水聲

題玄哲禪師影堂

吾師視化身一念即遺塵巖谷藏塔江湖散學人
雲迷禪處石院掩寫來真寂寞焚香後閉堦細草生

登慈恩寺塔

牕戶層風清涼碧落中世人來往別烟景古今同
列岫橫秦斷長河極塞空斜陽越鄉思天末見歸鴻

送友人東歸

遠涉期秋卷將行不廢吟故鄉芳草路來往別離心
挂席春風盡開齋夏景深子規誰共聽江月上清岑

將離江上作

白衣歸樹下青草戀江邊三楚足深隱五陵多少年
寂寥聞蜀魄清絕怨湘絃岐路在何處西行心渺然

別李參軍

王孫遊不遇况我五湖人野店難投宿漁家獨問津
嶺分中夜月江隔兩鄉春靜想青雲路還應寄此身

題湖上友人居

豈得戀樵漁全家湖畔居遠無潮客信閑寄岳僧書
野梅繁後山明雨散初迢迢向雲水莫與宦情疎

弔前水部賈員外

籠中江海禽日夕有歸心魏闕長謠久吳山獨徃深
別時羣木落終處亂猿吟李白墳前路溪僧送入林

題小松

松子落何年纖枝長水邊斫開深澗雪移出遠林烟
帶月棲幽鳥兼花灌冷泉微風動清韻閑聽罷琴眠

送河西從事

結束佐戎旃河西住幾年隴頭隨日去磧裏寄星眠
水近沙連帳程遙馬入天聖朝思上策重待奏安邊

周繇

題東林寺虎跑泉

跑一作梧

勝致通幽感靈泉自虎跑爪擡山脉斷掌托石心坳

竹靄凝相近松陰蓋亦交轉令棲遁者真境愈難拋

望海一作海望一作登望江峯詩中惟愁一作翻然境一作顧應一作知

滄茫空泛日四境絕人烟半浸中華岸旁通異域船
島間應有國波外恐無天欲作乘槎客惟愁去隔年

螢

熠熠與娟娟池塘竹樹邊亂飛同曳火成聚却無烟
微雨洒不滅輕風吹欲然舊曾書案上頻把作囊懸

登甘露寺一作多景樓

盤江上幾層峭壁半垂藤殿鎖南朝像龕禪外國僧

海濤椿砌檻山雨洒窓燈日暮疎鐘起聲聲徹廣陵

甘露寺東軒一作多景樓其二

每日憐晴眺閑吟只有娛山從平地有水到遠天無
老樹多封楚輕烟暗染吳雖居此廊下入戶亦踟躕

甘露寺北軒一作多景樓其三

曉色宜閑望山風遠益清白雲連晉閣碧樹盡燕城
水靜沙痕出烟消火野平最堪佳此境為我長詩情

送邊上從事

戎裝佩鎔鉏走馬逐輕車衰草城邊路殘陽隴上笳

黃河穿漢界青塚出湖沙提筆男兒事功名立可誇

送洛陽崔員外

塞詔除嵩洛觀圖見廢興城遷周古鼎地列漢諸陵
日送歸朝客時招住嶽僧郡齋臺閣滿公退即吟登

送人尉黔中

詩中驛一作邑

盤山行幾驛水路復通巴陝漲三川雪園開四季花
公庭飛白鳥官俸請丹砂知尉黔中後高吟采物華

送宇文虞

此別欲何往未言歸故林行車新歲近落日亂山深

野店寒無客風窠動有禽潛知經目事大半是愁吟

杜荀鶴

春宮怨

早被嬋娟誤欲粧臨鏡慵承恩不在貌教妾若爲容
風暖鳥聲碎日高花影重年年越溪女相憶採芙蓉
訪道者不遇

寂寂白雲門尋真不遇真祇應松上鶴便是洞中人
藥圃花香異沙泉鹿跡新題詩留姓字他日此相親
送人遊吳

君到姑蘇見人家盡枕河古宮閑地少水港小橋多
夜市賣菱藕春船載綺羅遙知未眠月鄉思在漁歌

送陳臚歸麻川

麻川清見底似入武陵溪兩岸山相向三春鳥亂啼
酒旗和柳動僧屋與雲齊即此吾鄉路懷君夢不迷

出山

病眼看春榜文場公道開朋人登第盡白髮出山來
處世曾無過唯天合是媒長安不覺遠期送一名迴

浙中逢詩友

到處有同人多爲賦與文詩中難得友湖畔喜逢君
凍積城根雪風開嶽面雲苦吟吟不足爭忍話離羣

送人遊吳越

去越從吳過吳疆與越連有園多種橘無水不生蓮
夜市橋邊火春風寺外船此中偏重客君去必經年
出常山界使回有寄

自小只南北未知今日離封疆初盡處人使却回時
問口有所忌此心無可爲行行復垂淚不稱是男兒

經廢宅

人生當貴盛修德可延之不慮有今日爭教無破時
蘚侵題字壁花發帶巢枝何況蒿原上荒墳與折碑

登天台寺

一到天台寺高低景旋生共僧巖上坐見客海邊行
野色人耕破山根浪打鳴忙時向閒處不覺有閑情

途中春

馬上覽春色丈夫慙淚垂一生看老却五字未遙知
酒力不能久愁根無可醫明年到今日公道與誰期
入關歷陽道中却寄舍弟

求名日苦辛日望自榮親落葉山中路秋霖馬上人
晨昏知汝道詩酒衛吾身自笑拋麋鹿長安擬醉春

贈歐陽明府

即石埭令

賢宰宰斯邑政聞閭里間都緣民訟少長覺吏徒閒
帆落尊前浦鐘鳴枕上山回舟却惆悵數宿釣魚灣

贈臨上人

不計禪兼律終須入悟門解空非有自所得是無言
眼豁浮生夢心澄大道源今來習師者多鎖教中猿

題戰島僧居

在江之心

自注

師愛無塵地江心島上居接舡求化慣登陸赴齋疎
載土春栽樹拋生日餒魚入雲蕭帝寺畢竟欲何如

別衡州牧

朝別使君門暮投江上村從來無舊分臨去望何恩
行計自不定此心誰與論秋猿叫寒月祇欲斷人魂

送人游江南

滿酌勸君酒勸君君莫辭能禁幾度別即到白頭時
晚岫無雲蔽春帆有燕隨男兒兩行淚不欲等閒垂

遊茅山

步步入山門仙家鳥徑分漁樵不到處麋鹿自成群
石面併出水松頭穿破雲道人星月下相次禮茅君

讀友人詩卷

冰齒味搖軸祇應鬼神知坐當羣靜後吟到月沉時
雪峽猿聲健風櫂鶴立危篇篇一頁字誰復更言詩

寄從叔

三族下當路長年猶布衣苦吟天與性直道世將非
鴈夜愁癡坐漁鄉老憶歸爲儒皆可立自是拙時機

寄李溥

如我如君者不妨身晚成但從時輩笑自得古人情
慎莫更初志俱期立後名男兒且如此何用歎平生

郊居即事投李給事

無祿奉晨昏閑居幾度春江湖苦吟士天地最閑人
書劍同三友蓬蒿作四鄰相知不相薦何以自謀身

寄詩友

別來春又春相憶喜相親與我爲同志如君能幾人
何時吟得力漸老自關身惟有前溪水年年浣客塵

贈田家翁

田翁真快活婚嫁不離村州縣供輸罷追隨鼓笛喧
盤餐同老少家計仰田園自說身無事應官有子孫

長安冬日

近臘饒風雪閒房凍坐時書生教到此天意轉難知
吟苦猿三叫形枯栢一枝還應公道在未忍與山期

唐興寺水閣

一雨三秋色蕭條古寺間無端登水閣有處似家山
白日生新事何時得暫閒將知老僧意未必戀松關

山中寄友

吟得力以詩
取科第也

深山多隙地無地及耕桑不是營生拙多緣覓句忙
破窻風翳燭穿屋月侵床吾友應相笑辛勤道未光

自述

四海欲行遍不知終遇誰用心常合道出語或傷時
擬作閒人老慙無識者知如今已無計祇得苦於詩

題江山寺

江上山頭寺景留吟客船遍遊銷一日重到是何年
沙鳥多翹足巖僧半露肩爲詩多語溢喜此得終篇
秋日旅舍卧病呈所知

末句有悞

秋色上庭枝愁懷切向誰青雲無勢日華髮有狂時
枕上聞風雨江南繫別離如何吟到此此到不聞知

秋宿山館

山館坐待曉夜長吟役神斜風吹敗葉寒燭照愁人
蘊蓄天然性澆訛世態真男兒出門志不獨爲謀身

贈老僧

衆僧尊夏臘靈嶽遍曾登度水手中杖行山溪畔藤
心空默是印眉白雪爲稜自得巡方道棲禪老未能

別舍弟

欲住住不得出門天氣秋惟知偷拭淚不忍更回頭
此日只愁老况身方遠遊孤寒將五字何以動諸侯

雪中別詩友

酒寒無小戶請滿酌行杯若待雪消去自然春到來
出城人跡少向暮鳥聲哀未遇應關命候門處處開

題嶽麓寺

一簇楚江山江山勝此難覓人來盡取到處得吟看
鶴隱松聲盡魚沉檻影寒自知心未了閒話亦多端

懷廬嶽書齋

長憶在廬嶽免侵塵土顏煮茶牕底水採藥屋頭山
是境皆遊遍誰人不羨閒無何一名繫引出白雲間

題興唐寺小松

雖小天然別難將衆木同侵僧半牕月向客滿襟風
枝拂行苔鶴聲分叫砌蟲如今未堪看須是雪霜中

與友人話別

家路行多少千人無易顏未成終老計難致此身閒
月兔走入海日鳥飛出山流年住不得半在別離間

贈廬嶽隱者

自見來如此未嘗離洞門結茅遮雨雪採藥給晨昏
古樹藤纏殺春泉鹿過渾悠悠無一事不似屬乾坤

懷紫閣隱者

紫閣白雲端雲中有地仙未歸蓬島上猶隱國門前
洞口人無跡花陰鹿自眠焚香賦詩罷星月滿遙天

題會上人院

鼓角城中寺師居自得閒心能行大道何用在深山
破衲新添線空門夜不關心知與眼見終取到無間

送黃補闕南遷

得罪非天意分明謫去身一心貪諫主開口不防人
自古有遷客何朝無直臣喧然公論在難滯楚南雲
送賓貢登第後歸海東

歸捷中華第登船鬢未絲祇應天上桂別有海東枝
國界波窮處鄉心日出時西風送君去莫慮到家遲
近試投所知

白髮隨梳落吟懷說向誰敢辭成事晚自是出山遲
擬動如浮海凡言似課詩終身事知己此外復何爲
送人牧江州

水國兵戈後難官在此時遠分天子命深要使君知
但遂生靈願當應雨露隨江山勝他郡閒賦庾樓詩

辭座主侍郎

一飯尚懷感况攀高桂枝此恩無報處故國遠歸時
祇恐兵戈隔再趨門館遲茅堂拜親後特地淚雙垂

別從叔

立馬不忍上醉醒天氣寒都緣在門易直似別家難
世路既如此客心須自寬江村亦饑凍爭及問長安

送人遊嶺南

凡遊南國者未有不蹉跎到海路難盡掛帆人更多
潮沙分象跡花洞響蠻歌縱有投文處於君能幾何

經賈島墓

謫宦自床衣銜冤至死時山根三尺墓人口數聯詩
仙桂終無分皇天自有私暗松風雨夜空使老猿悲

秋夜晚泊

一望一蒼然蕭騷起暮天遠山橫落日歸鳥度平川
家是去秋別月當今夕圓漁翁似相伴徹曉葦叢邊

送舍弟

我愛羈縲慣客情方細知好看前路事不比在家時
勉汝言須記聞人善即師旅中無廢業時作一篇詩
經九華費徵君墓

凡弔先生者多傷荆棘間不知三尺墓高却九華山
天地有何外子孫無亦閑當時若徵起未必得身還

溪居叟

溪翁居靜處溪鳥入門飛早起釣魚去夜深乘月歸
見君無事老覺我有求非不說風霜苦三冬一草衣
與友人對酒吟

憑君滿酌酒聽我醉中吟客路如天遠侯門似海深
新墳侵古道白髮戀黃金共有人間事還須濟物心

送僧

道了亦未了言閒今且閒從來無住處此去向何山
片石樹陰下斜陽潭影間請師留偈別恐不到人寰
送九華道士遊茅山

忽起他山興飄然出舊山於身無切事在世有餘閒
日月浮生外乾坤大醉間故園華表上誰得見君還

寄舍弟

世亂信難通鄉心日萬重弟兄皆向善天地合相容
大野陰雲重連城殺氣濃家山白雲裏卧得最高峯
下第投所知

若以名場內誰無一軸詩縱饒生白髮豈敢怨明時
知己雖然切春官未必私寧教讀書眼不有看花期

寄顧雲

省得前年別蘋洲旅館中亂離身不定彼此信難通
南國兵雖斂吾鄉業已空秋來憶君夢夜夜逐征鴻
贈宣城麋明府

天下爲官者無君一軸詩數篇同我得當代遇誰知
年齒吟將老生涯說可悲何當拋手板隣隱過危時

閨情一作望遠

門前通大道望遠上高臺落日人行盡窮邊信不來
還聞戰得勝未見敕召回却入機中坐新愁織不開
投長沙裴侍郎

欲露塵中事其如不易言家山一離別草樹匣中喧
吹夢風天角啼愁雪嶽猿佇思心覺滿何以遠滿軒

贈秋浦金明府

倚郭難爲宰非君即有私惟憑野老口不立政聲碑
苦甚求名日貧於未選時溪山竟如此利得且吟詩
和高秘書早春對雪登樓見寄之什

天有惜花意恐花開染塵先教微雪下始放滿城春
且醉登樓客重期出郭人因酬郢中律霜鬢數莖新

亂後山中作

自從天下亂不敢別庭闈兄弟團藥樂羈孤遠近歸
文章甘世薄耕種喜山肥直待中興後方應出隱扉

旅寓書事

日日驚身事悽悽欲斷魂時清不自立髮白傍誰門
中路殘秋雨空山一夜猿公卿得見面懷抱細難言

舟行晚泊江上寺

久勞風水上禪客喜相依掛衲雖無分修心未覺非
日沉山虎出鐘動寺禽歸月上潮平後談空漸入微
長林山中聞賊退寄孟明府

一縣今如此殘民數不多也知賢宰好爭柰亂兵何
皆自干戈達咸思雨露和應憐住山者頭白未登科

泗上客思

痛飲復高歌愁終不柰何家山隨日遠身事逐年多
沒鴈雲橫楚兼蟬柳夾河北心閒未得到處被詩磨

寄同人

盡與貧爲患惟余即不然四方無靜處百口度荒年
白髮生閒事新詩出數聯時情意如此不免却歸田

下第出關投鄭拾遺

丹青桂有枝未折未云遲况是孤寒士兼行苦澁詩
杏園人醉日關路獨歸時更卜深知意將來擬薦誰

塞上

草白河冰合蕃戎出掠頻戍樓三急號探馬一條塵
戰士風霜苦將軍雨露新封侯不由此何以慰征人

別敬侍御

交道有寒暑在人無古今與君中夜話盡我一生心
所向未得志豈惟空解吟何當重相見舊隱白雲深

送青陽李明府

善政無慚色吟歸似等閒惟將六幅絹寫得九華山
求理頭空白離京債未還仍聞猿與鶴都在一船間

將遊湘湖有作

一家相別意不得不潸然遠作南方客初登上水船
嶽鐘思冷夢湘月少殘篇便有歸來計風波亦隔年

送姚庭珪

脫衣將換酒對酌話何之雨露秋蕭索天涯晚別離
人生無此憾髮色不成絲未得重相見看君馬上詩

投李大夫

自小僻於詩篇篇憾不奇苦吟無暇日華髮有多時
進取門難見升沉命未知秋風夜來急還恐到京遲

貽里中同志

鄉里爲儒者惟君見我心詩書常共讀雨雪亦相尋
貧賤志氣在子孫交結深古人猶晚達况未髮霜侵

江上逢韋彖先輩

不易爲離抱江天即見鴻暮帆何處落涼月與誰同
木葉新霜後漁燈夜浪中時難慎行止吾道利於窮

維揚逢詩友張喬

天下方多事逢君得話詩直應吾道在未覺國風衰
生計吟銷日人情醉過時雅篇三百首留作後來師

秋晨有感

木葉落時節旅人初夢驚
鐘才枕上盡事已眼前生
吟髮不長黑世交無久情
且將公道約未忍便歸耕

秋日山中寄李處士

吾輩道何窮寒山細雨中
兒童書懶讀果栗樹將空
言論關時務篇章見國風
昇平猶可用應不廢爲公

晚泊金陵水亭題一作水亭在臺城寺

江亭當廢國秋景倍蕭騷
夕照殘荒壘寒潮漲古濠
就田看鶴劣隔水見僧高
無限前朝事醒吟易覺勞

錢塘別羅隱

故國看看遠前程計在誰
五更聽角後一葉渡江時
吾道天寧喪人情日可疑
西陵向西望雙淚爲君垂

山中貽同志

君貧我亦貧爲善喜爲隣
到老如今日無心媿古人
閉門非傲世守道是謀身
別有同山者其如未可親

秋日懷九華舊居

吾道在五字吾身寧陸沉
涼生中夜雨病起故山心
燭共寒酸影蛩添苦楚吟
何當遂歸去一徑入松林

江岸秋思

驅馬傍江行鄉愁步步生
舉鞭揮柳色隨手失蟬聲
秋稼緣長道寒雲傍古城
家貧遇豐歲無地可歸耕

哭劉德仁

賈島還如此生前不見春
豈應詩苦者便是命窮人
家事因吟失時情礙國親
多應銜恨骨千古不爲塵

經青山弔李翰林

何爲先生死先生道自新
青山明月夜千古一詩人
天地空銷骨聲名不傍身
誰移却陽塚來此作吟隣

下第東歸別友

不得同居住當春別帝鄉
年華落第老岐路出關長
芳草綠流水殘花向夕陽
懷親暫歸去非是釣滄浪

秋宿詩僧雲英房因贈

賈島憐無可都緣數句詩
君雖是後輩我謂過當時
溪浪和烟動松陰帶鶴移
同吟到明坐此道淡誰知

送人宰吳縣

海漲兵荒後爲官合動情
字人無異術至論不如清
草履隨船賣綾梭隔岸鳴
惟持古人意千里贈君行

讀友人詩

未陽有杜公家
那少陵也乃其
子宗文之墓耳
此亦誤用

君詩通大雅吟覺古風生外却浮華景中含教化情
名應高日月道可潤公卿莫似孤寒耻孤寒達更榮

登山寺

鑿曰按萬歷杭州志是詩蓋題新城寧國院作也

山半一山寺野人秋日登就中偏愛石獨上最高層
有果猿攀樹無齋鴿看僧儒門自多事來此復何能

辭九江李郎中入關

帝里無相識何門跡可親願開言重口薦與分深人
卷許新詩出家憐舊業貧今從九江去應免更迷津

江南逢李先輩

李杜復李杜彼時逢此時干戈侵帝里流落向天涯
歲月銷於酒平生斷在詩懷才不得志祇恐滿頭絲

秋日寄吟友

閒坐細思量惟吟不可忘食無三畝地衣絕一株桑
蟬樹生寒色漁潭落曉光青雲舊知己未許釣滄浪

江上與從弟話別

相逢盡說歸早晚遂歸期流水多通處孤舟少住時
千人不得已非我欲爲之及此終無媿其如道在茲

送友人遊南海

南海南邊路君遊祇爲貧山川多少地郡邑幾何人
花鳥名皆別寒暄氣不均相期早晚見莫待瘴侵身

贈聶尊師

詩道皆仙分求之不可求非關從小學應是數生修
蟬桂雲梯折鼇山鶴駕遊他年兩成事堪喜是鄰州

旅感

白髮根叢出鑷頻愁不開自憐空老去誰信苦吟來
客路東西濶家山早晚回翻思釣魚處一雨一層苔

寄益陽武明府

縣稱詩人理無嫌日寂寥溪山入城郭戶口半漁樵
月滿彈琴夜花香灑酒朝相思不相見雲水路迢迢

湘中秋日呈所知

四海無寸土一生惟苦吟虛垂異鄉淚不動貴人心
雨色凋湘樹灘聲下塞禽求歸歸未得非是擲光陰

苦吟

世間何好事最好莫過詩一句我自得四方人已知
生應無歇日死是不吟時始擬歸山去林泉道在茲

閩中別所知

觸目生歸思那堪路七年臘中離此地馬上見明年
郡邑溪山好寒暄日月偏自疑雙鬢雪不似到南天
塞上傷戰士

戰士說辛勤書生不忍聞三邊遠天子一命信將軍
野火燒人骨陰風捲陣雲不知禁城裏何以重要勳

春日訪獨孤處士

地僻春來靜深宜長者居好花都待晚修竹不妨疎
鴈入湘江食人侵曉色鋤似君無學處頭白道如初
哭友人

病向名場得終爲善誤身無兒承後嗣有女托何人
葬禮難求備交情少救貧惟餘舊文集一覽一沾巾

栽竹

斫破蒼苔色因栽竹數莖牕風從此冷詩思當時清
酒入杯中影綦添局上聲不同桃與李瀟灑伴書生

送吳蛻下第入蜀

下第言之蜀那愁舉別杯難兄方在幕上相復憐才
鳥徑盤春靄龍湫發夜雷臨邛無久戀高桂待君回

亂後歸山

亂世歸山谷征聲喜不聞詩書猶滿架弟姪未從軍
山犬眠紅葉樵童唱白雲此中非我志終擬致明君

題著禪師

大道本無幻常情自有魔人皆迷著此師獨悟如何
爲岳開牕闕因蟲長草多說空空說得空得到維摩

春日閒居即事

未得青雲志春同秋日情花開如葉落鶯語似蟬鳴
道合和貧守詩堪與命爭饑寒是吾事斷定不歸耕

秋宿棲賢寺懷友人

一宿三秋寺閑忙與曉分細泉山半落孤客夜深聞
鶴去巢盛月龍潛穴擁雲苦吟方見景多恨不同君

亂後再逢汪處士

如君真道者亂世有閑情每別不知處見來長後生
藥非因病服酒不爲愁傾笑我於身苦吟髭白數莖

山中喜與故交宿話

遠地能相訪何慙事力微山中深夜坐海內故交稀
村酒沽來濁溪魚釣得肥貧家只如此未可便言歸

觀碁

對面不相見用心同用兵
人嘗欲殺顧已自貪生
得勢侵吞遠乘危打劫
贏有時逢敵手當局到更深

送人宰德清

亂世人多事耕桑或失時
不聞寬賦歛因此轉流離
天意未如是君心無自欺
能依四十字可立德清碑

寄竇處士

漳水醉中別今來猶未醒
半生因酒廢大國幾時寧
海畔將軍柳天邊處士星
遊人不可見春入亂山青

題歷山舜廟

山有廟呼爲帝二子多變妖異
爲時所敬自注

昔舜魯耕地遺風日寂寥
世人那肯祭大聖不興妖
殿守秋霖壤杉松野火燒
時訛競淫祀絲竹醉山魈

贈李蒙叟

在我成何事逢君更勸吟
縱饒不得力猶勝別勞心
凡事有興廢詩名無古今
百年能幾日忍不惜光陰

維揚冬末寄幕中二從事

聞道長溪尉相留一館閒
莫思歸去路尚隔幾重山
爲旅春風外懷人夜雨間
年來疎覽鏡怕見減朱顏

送紫陽僧歸廬岳舊寺

紫衣明主贈歸寺感先師受業恩難報開堂影不知
松風欹枕夜山雪上樓時此際無人會微吟復斂眉
亂後送友人歸湘中一作送人遇亂

家枕三湘岸門前即釣磯漁竿壯歲別鶴髮亂時歸
嶽暖無猿叫江春有燕飛平生書劍在莫便學忘機

李昭象

赴舉出山留寄山居鄭參軍

還如費冠卿向此振高名肯羨魚鬚美長誇鶴鬣輕
理琴寒指倦試藥黑髭生時泰難雲卧隨看急詔行

喜杜荀鶴及第

深巖負復病榜到見君名貧病渾如失山川頓覺清
一春尋酒興四海舊詩聲日使能吟者西來步步輕



